



GEMEINDE/VISCHNAUNCA
DISENTIS/MUSTÉR

Cussegl da vischunaunca
54-2017/2020

Center Fontauna

Revisiun parziale dil regulativ da menaschi

M E S S A D I

dalla suprastonza communalia al cussegl da vischunaunca

Stimau signur president
Preziadas signuras cusseglieras
Preziai signurs cussegliers

Ils 27 da settember 2020 han votantas e votants dalla vischunaunca da Mustér concediu cun ina maioritad da 65 % in credit net da maximalmein frs. 8'690'000.-- per l'emprema etappa dall'innovaziun, amplificaziun e digl engrondiment cumplessiv dil Center Fontauna. La participaziun alla votaziun ha muntau a 74.2 %.

Structura

Il Center Fontauna ei in menaschi public independent. El vegn menaus sco atgna unitad cun in quen separau tenor ils criteris da fatschenta. Ina pusseivladad ei da saver integrar quei menaschi public ils proxims onns en ina "INFRA SA" intercommunalia nua che pliras vischnauncas ein participadas. Igl emprem pass ei succedius cun ina collaboraziun ensemens cun la vischnaunca da Tujetsch pertuccont il Bogn Sedrun. Ei drova dalla vart politica gronds sforzs pils proxims pass. Daguet e daguet fa puoz ed aschia quintein nus da saver semover en in futur cun in ferm fundament finanzial.

Revisiun parziale dil regulativ

Ladinamein suenter la votaziun positiva per l'emprema etappa dall'innovaziun, amplificaziun e digl engrondiment cumplessiv dil Center Fontauna ei la cumissiun da menaschi e da baghegiar dil Center Fontauna semessa alla laver. Sper las incarcas da planisaziun ei la cumissiun da menaschi era s'occupada d'adattar il regulativ pil menaschi dil Center Fontauna sco era la cunvegna da prestaziun cun la vischnaunca.

A caschun da sia seduta dils 23 da november 2020 ha la suprastanza communalia approbau la cunvegn da prestaziun adattada. Sper la translaziun dalla cunvegna cuntegn ella la midada sil niev num dil Center Fontauna. Igl ulterieur cuntegn ei buca vegnius midaus ed aschia indemnisescha la vischnaunca vinavon il Center Fontauna cun las summas annualas da frs. 90'000.-- pil diever entras la scola e cun frs. 74'000.-- per la differenza dallas taxas ufficialas per las uniuns indigenas.

Era ella revisiun parziale dil regulativ da menaschi ei il num vegnius midaus da Center da sport e cultura sin Center Fontauna. Ils ulteriurs pucts centrals della revisiun parziale ein:

Art. 3 Principis d'organisaziun

In punct impurtont ei la midada dalla metoda effectiva da quintar giu la taglia sin plivaleta.

Las investiziuns e la finanziazion ston naven da 2021 vegnir cudischadas ed amortisadas el quen dil Center Fontauna. En connex cun l'autla summa d'investiziun ha la vischnaunca giu dau a Durschei Fiduziaria SA l'incarica da sclarir la pusseivladad da pretender anavos dalla Confederaziun la taglia sin plivaleta. Las retschercas ein vegnidias resumadas en in pareri. Per obtener la restituziun sto il Center Fontauna midar sill'entschatta digl onn 2021 sin la metoda effectiva da quintar giu la taglia sin plivaleta (TPV). Consequentamein augmentan las amortisaziuns ed ils tscheins pils emprests il deficit annual dil CF, quei che vegn entochen ussa cudischau el quen da gudogn e sperdita dalla vischnaunca.


Art. 4 Cumposiziun

Il diember da commembers della cumissiun da menaschi Center Fontauna duei vegnir reducios da tschun sin treis analog alla structura dil Bogn Sedrun. Plinavon duei il cusegl da vischnaunca e buca pli la suprastanza communalia eleger la cumissiun. La cumissiun duei seconstituir sezza ed eleger siu president ni sia presidenta.

Art. 10 Direcziun

La cumissiun CF sto esser efficienta cun structuras fetg semplas. Per quei motiv duei la direcziun vegnir abolida.

Organisaziun Center Fontauna



Proposta

Sin fundament dallas ponderaziuns suramenziunadas

propona

la suprastonza communal al cussegl da vischnaunca d'approbar la revisiun parziale dil regulativ pil menaschi dil Center Fontauna.

Suprastonza communal Disentis/Mustér
Il president: Il canzlist:

Robert Cajacob

Andri Hendry

Disentis/Mustér, ils 25 da november 2020